

## QUÆSTIO MEDICA,

*Cardinalitiis disputationibus manè discutienda in Scholis  
Medicorum, die Foris 16. Junii 1712.*

M. JOANNE BOUDIN Regi ab omnibus consiliis  
& Medico perpetuo ordinario necnon S. S. Delphini &  
Delphinæ dum viverent primario, Doctore Medico  
Parisiensi, Præside.

*Convenitne omnibus hominibus una & eadem vivendi ratio?*

### I.

**Q**UANTA sit in Corpore humano, per assiduam perspirationem, succorum deperditio, nemini dubium est. Quotquot sunt occulti meatus per universam cutis substantiam disseminati, ad hoc unum instituti sunt ut reliquas roris nutritii particulas excernant; dum scilicet repetitis arteriarum oscillationibus tenuiores factæ, hujus tandem texturæ sunt ut angustas adeo vias possint faciliè permeare. Inde alimentorum necessitas; si enim ferè mentem fugit multiplex vasorum apparatus & immanis longitudo, stupenda sanè, & vix satis hucusque ponderata liquidorum vaporatio, non minorem postulat alimoniarum copiam quàm resarciri possit. Solida hæc vel fluida, cibo & potu continentur. Utriusque delectus & modus totam complectitur artem tuendæ sanitatis. Quidquid enim sub sanguinis specie, pravi vel boni succi, per universum corpus diffluit, primam subit in ventriculo mutationem, quæ digestionis nomine nuncupatur. An verò illa solà & unicâ trituratione perficiatur, vel utrùm in partem operis veniat fermentum quoddam insitum intimas alimenti cujusvis particulas dividere natum, hæc non licet perpendere. Ingeniosum equidem triturationis systema, agentis Naturæ simplicitatem refert, & quidquid in succi dulcis & nutritii, qualis est Chylus, præparatione peragitur eleganter exponit. Videntur quin immò fermenta artis Chymicæ opera, acida, salsa, acris, & amara, vix posse hujus liquoris naturam induere qui nullius, ut ita dicam, saporis, omnes tamen corporis partes rore suo luculenter irrigat. Sed quidquid in ventriculo Chyli elaborationem promoveat, ad vitæ tutelam & firmam sanitatis conservationem nihil præstabilius, quàm eorum alimentorum delectus, quæ vel triturationi faciliè cedant, vel, quod non mediocris famæ Medicis magis arridet, fermenti vires non possint eludere. Horum non modò conditionem, verùm & copiam diligentius attende. Si enim hujus ponderis sunt, ut tantum onus ventriculus vix sustineat, minùs bene confecto coctionis opere, brevi macies, & nova februm cohors incubuerit. Misceantur igitur liquida solidis & cibo potus, eà ratione, ut possint unà conferre ad hujus succi elaborationem, qui partes corporis singulas alere, fovere, & etiam, si adhuc explicari possunt, extendere valeat.

**Q**UAE virtus & quanta sit vivere parvo, non inter lances nitentesque men-  
sas, verum hinc impransum mecum disquirite. Mirum est quam tenuis victus  
immanem spirituum dissipationem valeat refarcire. Qui parcis & duris vi-  
vunt, exiguum quod nobis vitæ curriculum Natura circumscripsit producunt  
ad extremam senectutem. Dummodò labor extuderit fastidia, cum sale panis  
latrantem stomachum benè leniet. Non in caro nidore voluptas summa sed in te  
ipso est. Paucis contentus erit quicumque id unum cupiet quod satis est, rarò  
enim jejunos vulgaria temnit stomachus, spernitque cibum vilem. Sed dic  
quæso? Si fortioribus animantibus, aqua, herbæ, frumenta, pro potu & cibo,  
ad vires sustinendas sufficiant, si tam exiguo victu refecta, immensi ponderis  
onera per longa & aspera itinera gestant; putasne homines validioribus indigere  
alimentorum præsiidiis? Ita sanè sentiunt voraces illi & gulæ omnino dediti,  
qui se cibis quotidie ingurgitant, qui ad id unum propagare putant animalia,  
lucere solem, terram olera & fructus edere, ut sibi malè natam comedendi  
cupiditatem expleant. Horum palato minis aridet, & nullius saporis est vi-  
num à Naturâ diligentius elaboratum. Magno cum damno, magnâ cum arte  
& industria, spiritum ex ipso inflammabilem eliciunt, & quod viribus omnino  
prostratis & animi deliquio præsidium erat & equidem optimum, pro potu  
communi & assiduo sorbent. Sed quot & quanta sint hujus immodici victus  
incommoda, & quæ malorum series tam lauta & splendida convivia conse-  
ctetur, vix dixeris. Condimenti cujusque mole & pondere veluti oppressa ven-  
triculi membrana, repetitis ictibus frustra coctionem aggreditur, quin immo  
eodem nisu universi corporis fibræ tremulis motibus plerumque concutiantur.  
Inde angores, anxietates, & nervorum subsultus; inde pallidi & veluti exanimés  
à cenâ dubiâ surgunt, atque affigunt humo divinæ particulam auræ. Accipe  
nunc victus tenuis quæ quantaque secum afferat. In primis valeas benè, vege-  
tus præscripta ad munia surgas, memor illius escae quæ simplex tibi olim se-  
derit. At simul assis miscueris elixa, conchylia turdis, dulcia se in bilem vertent,  
stomachoque tumultum lenta feret pœnita.

## I I I.

**V**ERUM qualiscunque sit ad vitæ incolumis diuturnitatem temperantiæ  
necessitas, non tamen omnibus esse debet eadem vivendi consuetudo. Quem-  
admodum etenim in variis hominibus tam diversa sunt Oris lineamenta, ut vix  
duo inter se consentiant, sic & temperamerta dissimilia dissimilem postulant  
alimentorum apparatus. Si præterea Regionem, ætatem, corporis magnitudi-  
nem spectes, variam sanè victus rationem instituas in tam variâ hominum con-  
stitutione. In his nempe Regionibus, in quibus propter caloris æstum languent  
vires & sanguis præter modum effervesceat, indigent Incolæ potu glacie vel  
nive refrigerato, neque hoc præsidio absque maximo sanitatis discrimine carere  
possunt; quod equidem sub hoc cælo potius voluptatis causâ in more est &  
plerumque nocet, nisi caloribus maximis & æstivo fervore in usum veniat. Sic  
Cerevisia, seu triticeæ latices mensis borealibus apta munera sunt, ex his terra  
venena meis: sic potio illa ex pomorum pirorumve succis expressis facta quæ apud  
Normannos familiaris est, in hisce nostris Provinciis minis prodesset, in quibus  
vinum ut ita dicam usus quasi mancipavit. Sunt qui tamen ab illo facillè absti-

neant, & quorum stomachus ad ejus conspectum nauseat. Appetunt alii, forsitan quia vetus consuetudo naturæ vim obtinuit. Aqua etenim germanus est hominum potus, & in se continet quidquid ad sedandam sitim necesse est. Verùm ætate jam provectâ, vinum de victu quotidiano penitus detrachere, res esset discriminis plena: sufficit si damnosè non potetur, sed moderatè. Idem de cibis dicendum est, quorum majorem ipsis copiam concedendam esse censemus quì valido & robusto corporis habitu, assiduo labore macerantur; sin minus victus parcimonia attenuati, vix hominum formam referunt & in ipsâ adolescentiâ senes apparent. Sic animalia magis minùsve vescuntur dum laborant vel quiescunt; sed tu in quantum poteris eos elige cibos, quos simplex natura paraverit. Addit enim illis ars gulæ illud unum, ut famem per damna revocent, alendis fovendisque partibus minùs idonei: cave tamen ne vaganti scæna licentiæ injiciens nimium serves in victu modum; quibus etenim Diæta ad amissum est, iisdem obsoniis corpus suum ita assuevere ut si quid insolitum degustent vix sustineant, nec possint absque periculo à tam severâ vivendi normâ vel latum unguem recedere; se se tam cautè aëris inclementiæ subripiunt ut vix sibi auram præbeant, vellent se in machinâ quoqueversum oclusâ abscondere, omnibus Reipublicæ officiis impares, quibus obeundis patientem esse decet pulveris atque solis; denique tam gravi sanitatis curâ & sollicitudine id efficiunt, ut morosi vitam ducant fastidiosam, nec morborum minùs expertem.

## I V.

**I**N tam variâ & dissimili vivendi ratione quæris quodnam vitæ genus instituas? Accipe, in promptu est. Illud quod tibi expertus sis esse convenientius. Cibus ille amicus est qui te juvat, æquum est etenim omnes sibi consulere. Ne igitur sanus & incolumis Medicum semper urgeas. His te alimentis refice, quæ in communem usum veniunt, neque noxium putes quidquid universa plebis consuetudo probavit esse innocuum. Abstine tamen ab his epulis, in quibus exquisitis ciborum irritamentis aviditas excitatur: fuge à cœrâ dubiâ. Apage insidiosa condimenta quæ invenit ars gulæ, & quibus, corporum animorumque vigor ac robur omne dilabitur. Naturam ducem optimam ausculta & sequere. Eius potiusve necessitatem indicabit utriusque appetentia, fames & sitis; sed fames vera & sincera, quam hesternæ vestigia crapulæ non stimulent; sitis quæ vini lusculem potati ardore non promoveatur. Quid lædat, quid prosit attende. Escarum coctionem diligentius inspicere, & cavere ne stomacho sufficiat quod vires ejus longè superet; bene erit si non gravatus surrexeris à convivio; si simul atque sopori membra dederis somnum plenum & optabilem ducas, nullis somniis, nullis anxietatibus conturbatum, qui corpus duris fessum ministeriis leve redadatque labori: si verò post mensam opiparam tibi nox inquieta & sollicita, si marè lingua & fauces aridæ appareant, si molestè alvum subducatur alimentorum congeries, si torminibus procellisque intestina commoveantur, prava & vendum perfecta coctionis symptomata toridem existimes. Hæc sunt signa; & certa indicia quæ te sanè non deludent, ex his judica quid sit de victu quotidiano detrahendum, & tibi eam vivendi legem impone quæ tot & tantæ voracitatis vitia emendare valeat. Aliam non habet vulgus vitæ regulam, quam tamen non inerte, non desidiosam ducit, sed difficilem, & operosam. At hujus generis hominum intemperantiam, arctissimis coercet limitibus res angusta domi, nec eos, nisi in improbis laboribus suscipiendis, immoderatos esse patitur,

**N**ON ergo omnibus hominibus prodest eadem vivendi methodus, eademque victûs ratio. Sunt quos olera frugesque juvent, sunt qui piscibus delectentur, & quorum stomachus succi plenas animalium carnes respuat. Ab hoc se cibo abstinerebat prisca gens mortalium: nondum etenim istam pabuli consuetudinem induxerat priorum mundi temporum simplicitas, quam sequentis ævi aviditas immanis familiarem hominum escam esse voluit. Illos tamen primos orbis incolae diuturniorem optimâ valetudine duxisse vitam testis est Historia omnium antiquissima sanctissimaque. Carnibus vescuntur alii sine damno, & ad piscium & butyri intuitum nausent. Sunt quibus oryza unicum alimentum est. Sunt denique quibus cuiusve generis condimenta placeant. Vix prandium de nomine noverat ætas parentum prima & unico, in die, pastu refici solebat. Hodie, cœnam sibi omnino detrahendam existimant quam plurimi. *Thé*, *Café*, *Chocolata*, sitis irritamenta, quæ gulæ luxuries non ita pridem induxit, tanquam maxima sanitatis præsidia à nonnullis judicantur. Quidam Baccho intemperantiis indulgent, seque languidos & exanimes conqueruntur, nisi hujus liquoris optimi beneficio foveantur. Nullam, sine vini subsidio, alimentorum elaborationem prædicant, sed erudam incoctamque congeriem unâ cum excrementis, quâ data porta, ruere. Aqua, aliis, ad perfectam dissolutionem & coctionem videtur idonea. Et re verâ quidquid nullius saporis est, omnes in se videtur habere dotes boni alimenti & optabilis. Etenim in utero matris gelatinâ dulcissimâ alitur fœtus, cujus in locum lac post ortum sufficitur. Postea panis & aqua pro potu & cibo in usum veniunt, ita ut nonnisi vini & carniarum abstinentiâ, eaque diuturnâ, corpora validiora & robustiora evadere experienciâ compertum sit. Quid plura? Vario quisque, cibo & potu sese recreat & reficit, nec inde vitæ summa brevior nisi minus cautè sibi unusquisque provideat. Vires igitur, temperamentum, regionem, anni tempestatem, ætatem, corporis magnitudinem, attento animo perpendant singuli, & illud vitæ genus sibi instituant in quo contra omnem morborum impetum armati omnia in se habeant præsidia diu, benè, beatèque vivendi.

*Ergo non omnibus hominibus convenit una & eadem vivendi ratio.*

Proponebat Parisiis JOANNES-BAPTISTA LE BRETHON,  
Peronnæus, Baccalaureus Medicus. A. R. S. H. 1712.